

四庫全書

史部

欽定四庫全書

平定兩金川方畧卷五十八

四月己丑阿桂明亮奏言臣等查納圍之第六碉  
與納扎木之第三碉均係賊番要地若使對面拏  
柵賊番窺見我兵注意防守必嚴臣等因令第一  
碉與第七碉正面均拏柵向前使之無從揣度  
而我兵繞從山梁上東西兩面分撲不難得手惟  
因連日雨雪尚於攻撲有碍儻兩三日快晴當即

督兵奮力上攻以期必得又本月十三日革布什  
咱土舍丹怎扎克巴送到該處脫出番人沙克置  
布木一名來營臣等親加訊問據稱係革布什咱  
博租寨人前在勒烏圍乘空逃由見勒烏圍噶拉  
依兩處牛馬羊猪瘟死將盡人亦多有病者臣等  
思賊番滅亡之兆已見惟有乘機奮攻以為搗穴  
擒渠之計

同日溫福海蘭察奏言烏什哈達阿爾蘇納等帶

兵二千二百餘名從達扎克角前進除防守後路  
接連擊柵外不敷進攻臣等因將各處官兵酌量  
抽出二千二百名交與總兵張大經等帶兵同烏  
什哈達阿爾蘇納之兵前往山梁進攻十八日天  
明時沿達扎克角山行至十餘里外將兩邊箐林  
中埋伏之賊盡行擊敗直向下壓遙見得斯東寨  
我兵即往攻取賊衆棄寨逃入對面高峯大木城  
中隨將此寨攻破其大木城在峯巒之上週圍深

溝密柵為犄角固守之計值天晚風雪驟至暫時  
收兵臣等詳觀形勢如至北邊山腿向下由溝進  
取便可越過昔嶺如下南邊山腿前進即可仰攻  
喀爾薩爾此處甚屬緊要賊俱死守必須大砲轟  
擊此數日雨雪路徑甚滑俟天晴時乘機進攻又  
閏三月十六日木果木後山卡兵解到金川投由  
番人薩卜嘉據稱本係小金川美臥溝人聞僧格  
桑住勒烏圍官寨後索諾木遣人送到噶布覺斯

寨居住又分寸百姓頭人不許稱僧格桑為土司  
百姓等言僧格桑是金川禍根不若早早獻出看  
來索諾木待僧格桑光景甚屬平常臣等思薩卜  
嘉所言雖難盡信然據歷次脫出番人所供彼此  
如一足該逆酋情形窘迫勢在必滅計日可待均  
奏入

上諭軍機大臣曰阿桂等奏稱現攻納圍之第六碉與  
納扎木之第三碉先令我兵於第一及第七碉正面

向前接拏卡柵仍擬覓間於山梁東西分撲使賊人無從揣度自是正辦溫福等奏稱烏什哈達等帶兵由達扎克覺溝壓下攻克得斯東寨賊番皆逃避對面本城烏什哈達等所帶僅二千人兵力尚不甚足溫福等或虛作攻昔嶺之勢而撤精兵為烏什哈達等進勦之用於事更為有益又喀爾薩爾賊碉亦須仰攻恐未能剋期制勝前奏達扎克覺山頭南通哈爾薩爾由西可至色爾里中間林深菁密溫福擬令

兵丁破伐樹株而行曾降旨詢商令其酌用火攻之法若果得有路逕直逼色爾果則我兵聲勢愈大且距噶拉依不遠昔嶺將不攻自潰實為事半功倍又據稱十八日因遇風雪暫時撤兵阿桂亦稱連日雪霧彼時尚係閏月中旬今已交四月夏令漸深自當日就暄暖各路軍營當乘時努力為之再阿桂奏訊據革布什咱脫由番人沙克宜布木供稱勒烏圍牛馬羊猪瘟死人亦多病今噶拉依人畜亦俱害瘟此



實羣逆罪惡貫盈自取滅亡之兆又據溫福所訊脫  
出小金川番人薩卜嘉供詞稱金川待僧格桑光景  
平常并聞百姓私議言僧格桑是金川禍根不如早  
早獻出可見索諾木等諸逆犯久已蓄心俟窘迫時  
獻出僧格桑為解免之地屢次所降諭旨甚明將軍  
等自各胸有定見勿因此稍有延緩使羣逆得以久  
稽顯戮

同日溫福劉秉恬奏言臣溫福於閏三月初五日

接駐札功噶爾拉之提督李煦副都統常保住稟  
稱本月初四日夜有賊從東北山梁下偷撲滿兵  
及陝兵之卡弁兵內有被賊刀矛傷死者查東北  
山梁乃係小金川地方與金川相距甚遠無路可  
通斷非金川賊匪敢來滋擾揆度其情或係小金  
川鄂克什等處換班無賴窮番前來偷竊等語臣  
等審度地勢該處逼近功噶爾拉了口明係金川  
賊衆由了口之旁乘夜潛來劫奪該提督等不能

預為防範所稱換班無賴窮番前來偷竊之語明  
係捏飾謹據實叅奏奏入

上諭軍機大臣曰李煦常保住派駐功噶爾拉防守實  
其專責乃既疎懈於前復敢捏報於後實由情理之  
外將李煦常保住革職即於軍營枷號示衆並令溫  
福傳諭德爾森保等加意慎防毋蹈覆轍至劉秉恬  
現駐簇拉角克為軍營緊要後各所有分派隘方隘  
口各員並當飭其留心防範毋稍玩忽干咎

臣等謹案賊番恃險憑阻深林疊嶂最便住來  
是時金川與小金川牽連勾結其勢已成必係  
賊酋窺伺官兵後路嘗探虛實思售奸計是以  
始從站員陳子檜所駐小牛廠地方焚燒搶劫  
嗣於功噶爾拉東北山梁撲卡傷人蠢動端倪  
此可概見我

皇上洞鑒情形即以德爾森保及劉秉恬所駐均屬軍  
營緊要後路嚴行

申諭至再至三在

聖明先事預防炳燭萬里無遠弗届使在事諸臣仰

遵

聖訓體察踪蹟嚴行堵截先有以杜其邪謀制其死命  
何至奸邪得逞同時並起致有失事之患也

庚寅

上諭軍機大臣曰溫福等叅奏李煦常保住捏報一案  
已諭將李煦常保住革職枷示矣今思溫福因其稟

報支離察出疑竇尚屬揆度之詞未得此案要領蓋  
李煦等捏報謂係小金川鄂克什換班窮番此即其  
緊要關鍵小金川鄂克什如果有換班之事無難按  
冊而稽若小牛廠失事時並無番衆換班則所報全  
虛詰訊自無能置喙已派內閣學士博清額前往會  
同劉秉恬秉公嚴訊博清額審訊具摺後馳往溫福  
軍營看視該處情形即行回京覆奏

辛卯富勒渾奏言本月十六日准副將軍豐昇額

等咨取熟鐵并蟹殼銅一萬斤臣查樂山縣蟹殼  
銅本已預備在省今揀擇一萬斤及所取熟鐵一  
併照數分起滾運查轟擊礮卡所需砲子鐵斤甚  
多臣亦先期辦就生鐵二十餘萬斤又聞川省大  
竹等縣產鐵甚旺委員前往採辦以備源源接濟  
奏入

上諭曰一切實力迅速辦理無為空言

同日

上諭內閣曰禮部尚書阿桂現在軍營敷歷宣勞著加  
太子太保以示優眷

丙申溫福阿桂豐昇額舒常奏言臣等伏思此次  
征勦金川為時未久賊酋力尚能支必須勇銳之  
兵攻摧要隘是以請調屯兵五百名倘能如數來  
營則黔兵原可無庸再調昨接劉秉恬抄寄摺稿  
內稱屯兵均已調赴木果木當噶爾拉軍營不敷  
再調惟於川省綠營內揀調四五百名等語臣等



思進勦兵丁惟黔兵屯兵最稱得力現在緯斯甲  
布一路黔兵五百名節次陣傷病故不無減少劉  
秉恬所派四五百名川兵祇可駐守後路與進勦  
仍屬有名無實臣等彼此札商實有必須添調黔  
兵之處據實具奏奏入報

聞

同日豐昇額舒常奏言臣等在新孛木柵之旁趕  
築砲臺約高二丈有餘賊番因臨近礮卡情形窘

迫盡力施放鎗砲官兵亦放連環賊番屢有擊斃者前以大礮屢次炸裂皆由銅質不淨即令匠役將銅鎔淨趕銅頭二號砲各一位臣等先將此處要隘設法攻開庶得統兵深入奏入報

聞

同日富勒渾奏言臣查從前各站人夫既無定數而派自各屬又不能全數押解到站自應詳加確核酌定章程使夫歸實用帑不虛糜臣查西路自

桃關至木果木軍營統計二十九站應安夫一萬  
六千四百名南路自雅安至當噶爾拉軍營統計  
二十二站應安夫七千二百名內除雅安至靈關  
計站就地雇夫之外實應安夫六千一百名緙斯  
甲布一路自灌縣至宜喜軍營統計四十三站應  
安夫一萬九千一百名內除灌縣至木堆六站就  
地雇夫之外實應安夫一萬七千二百名又章谷  
至丹東計八站共應安夫一千四百名以上各路

統計一百二站除去就地雇夫三千名外實需照  
站撥夫四萬一千一百名此外始哲爾覺至功噶  
爾拉現安站夫四千三百三十五名該處現存米  
石應俟滾運完竣再為酌減查當噶爾拉糧米軍裝  
現由木坪輓送綽斯甲布糧米軍裝現由三雜谷  
輓送而打箭爐轉運木池之米又係雇用烏拉今  
已將此路臺站全行裁減以節糜費臣通盤籌計  
除現議就地雇夫並折半派夫外實有額夫五萬

四千九百十九名再八折分派以舒民力通共可得夫四萬五千六百四十九名核之各路現需夫數實有寬餘惟是站多道遠臣復派委道員各員分路管理並飭將各站支用銀米按月取具清冊核明彙報庶州縣勞逸皆得適均而各站人夫專員稽察於運送轉輸更可無悞奏入

上嘉之

富勒渾又奏言臣督同司道等將川省自招商輓

運以來歷次派運軍糧議給腳價之數與十三年辦理金川成案細加比較其中多有參差不齊之案如按站計算每站每石自四錢五六分至六錢一二分不等按里計算每里每石自六七分至一分五六釐及二分零不等從前辦理時原係比照舊例酌量增減蓋自省至雅州商人可以水陸兼運又如打箭爐以外可以雇募烏拉馱載腳價較省情形原自不同其餘各處亦俱係分別道路之

險易程途之遠近及沿途食物之貴賤酌量增減而較之舊案均屬有減無增臣與軍需局司道等  
同商酌口外新增糧站因大兵日進日遠所有  
三路商運米石均照美諾等處每站每石給與腳  
價五錢之例遇進一站則加銀五錢統俟凱旋事  
竣據實報銷如商運之米石不能直送至辦運處  
量為酌減示罰奏入

上勅該部速議具奏旋經戶部議覆請均如所奏辦理

上從之

丁酉溫福海蘭察奏言臣等由達札克覺山梁奪  
獲得斯東賊寨隨攻對面高峯木柵但此數日或  
雪或雨總未放晴臣等將官兵調集分為四路進  
攻二十五日亥時起發於雪霧中乘賊不備各路  
兵丁皆至指定地方奮力攻取其由右翼前進額  
森特等之兵至賊碉根將卡奪獲殺死賊番二十  
餘名將碉拆毀臣海蘭察中路之兵與由左翼前



進普爾普等之兵雖已至賊碛近處俱限於泥凜  
是以撤回其從達札克覺攻取對面大木柵之富  
興等又將兵分為四隊其至木柵近處賊番在高  
處穴洞從空眼放鎗拋石我兵恐久立受傷亦行  
酌撤時有三四百賊番繞下欲來衝截我兵奮勇  
迎戰殺死四十餘名餘多受傷敗竄奏入

上諭軍機大臣曰溫福等此次勦殺賊番官兵皆各奮  
勉但殺賊究少今天時已熟雪漸消化若相機盡力

自必奪取要隘深入此際彼處情形若何著即作速  
奏入

同日溫福奏言臣准軍機處發到原圖謹於

硃筆標記處詳悉閱看查已得賊卡下尚有大木柵一  
座最為緊要必須得此方能再進連日運到大砲  
轟摧並於木柵之旁擊下十四座四面圍攻乃入  
夏以後雨雪轉稠一二日清明亦為難得臣已於  
二十六日派撥官兵督率攻勦至功噶爾拉了口

背後

聖明指示路徑查此處係屬路崖使官兵能一徑下去  
即可抄截了口之後從前臣在功噶爾拉進勦時  
即經籌辦及此令兵懸繩而下因接至數十丈尚  
未到底又積雪盈丈難以存住是以將先下之兵  
仍行繫上擬俟天氣稍晴再行籌辦茲復查此路  
之下又有小路可以斜通薩木喀若分一支由此  
前進則與達扎克覺之兵可收夾擊之益但中隔

山溝林箐深密若未經勦洗遽覓進攻保無後慮  
總俟將達札克覺勦洗淨盡妥籌速辦謹於原圖  
內詳加貼說恭呈

御覽

同日阿桂明亮奏言臣等查納圍第三四兩碉高  
據陡崖之上下有小山腿一支賊番築卡八處若  
出其不意分攻各卡可使難於支拒隨於二十日  
夜大雨如注之際挑派漢土官兵二百名潛伏爬

越突至卡前賊番未及防禦當將八處石卡同時  
攻獲臣等悉心籌議崖上碉座雖非前往噶拉依  
正路但得此碉亦可孤賊番之勢復於二十三日  
派漢土官兵三百名乘夜攻近碉旁賊番抵死拒  
守鎗石如雨黎明官兵始行撤回至二十六日分  
路進攻納圍一路官兵潛至碉下正擬攀登而上  
忽而濃陰密霧雨雪交加彼此不能望見賊番聞  
有聲響施鎗滾石往下壓打官兵難以用力因復

徐徐酌撤惟約扎木官兵逼近碉卡賊因雪霧迷漫有二三百人潛出憑高下壓經德赫布等奮力迎敵立斃賊番十餘名均奏入

上諭軍機大臣曰溫福奏近日攻勦情形又將原圖簽說覆奏據稱硃筆所標路道從此抄截功噶爾拉了口之後實為直捷從前派出土兵懸繩而下等語是朕現在所指之處溫福早經籌及甚屬可嘉至另簽所稱攻打木柵其地最為隘要自當上緊攻打以期

乘執果入又於山岡粘簽稱此處有小路斜通薩喀  
喀亦係抄截功噶爾拉之後但深溝密箐必將溝內  
賊寨勦洗方可進攻等語就圖中所列形勢而論官  
兵既經攻佔之山與薩木喀賊寨僅隔一峯似不甚  
遠今稱溝內賊寨尚多則此溝必在兩山中間難於  
畫出溫福惟當相機籌畫努力妥速為之又同日阿  
桂等奏稱二十日夜官兵乘大雨將八處石卡攻獲  
復於二十三等日乘夜溝至礮卡盡力攻擊又德赫

布等奮擊潛出碉卡之賊立斃十餘人各等語連次  
派出之將領弁兵攻碉殺賊均屬奮勉但尚未得實  
在險要難以交部議叙即溫福一路官兵亦然均著  
查明存檔俟將來一併交部錄叙

同日溫福奏言竊臣自進剿以來大小礮子俱用生鐵鎔鑄成

造較易從未用過熟鐵至每次攻得地方搜獲賊  
番拾存我兵礮子俱堆貯不用蓋緣番地素不產煤  
又不知燒炭之法不能鎔鐵其礮子俱係熟鐵則



其不能鑄用生鐵已可概見實不致有反藉寇兵之弊至鎗子及劈山小礮必須鉛丸取其圓淨賊番境內產鉛本少上年小金川即有鉛皮裹石之子金川大概相同臣時飭帶兵將領將火藥鉛丸等項留心稽查毋許稍有拋撒其土兵尤令加倍嚴防使無透漏奏入

上嘉之

同日阿桂奏言臣查綽斯甲布一路兵力稍單昨

據豐昇額來扎以屯兵既不可得仍須奏調黔兵  
二千名以資進勦並將所擬奏稿會商臣思黔兵  
奉

旨停止自必陸續回營但黔省本係預備三千名今若  
於附近省城及威寧畢節一帶各營內調用二千  
名入川尚近綽斯甲布軍營得此生力之兵士氣  
尤加振奮而賊見官兵陸續增添更為胆落一俟  
黔兵到日豐昇額酌撥存營之兵分於後路駐守

似於進勦留防均有裨益奏入

上諭軍機大臣曰前因進勦金川再需酌調黔兵曾諭  
圖思德預行選派續經豐昇額以現在毋庸調兵具  
奏隨又降旨令圖思德停止今據阿桂奏豐昇額一  
路兵力稍單仍請添調黔兵二千以資協勦等語著  
傳諭圖思德即於附近川省各營原備兵丁內揀選  
二千名迅令原派之員帶領前往並令富勒渾於沿  
途經過應行預備之處早為妥辦



平定兩金川方畧卷五十八

欽定四庫全書

史部  
平定兩金川方略卷  
五十九至  
六十一

員外郎臣顧宗泰覆勘

總校官原任侍講臣王燕緒

欽定四庫全書

平定兩金川方略卷五十九

四月戊戌

上諭軍機大臣等昨以豐昇額一路兵力稍單因傳諭

圖思德令將原撥之兵選派二千迅速起程前往今

恩派調黔兵原為協助進剿之勢若黔兵到時豐昇

額業已攻克日旁等處進攻勒烏圍自當令調到之

兵隨其縱進若日旁尚未攻克或溫福阿桂兩處不

拘何路攻取要隘帶兵深入即當令此二千黔兵由  
彼接續而進若兩路俱已攻得則將黔兵各分一千  
相隨續進以壯聲勢尤足令賊番喪胆而於後路聲  
援亦更為得力朕偶念及此事特為詳晰諭知溫福  
等于黔兵將到時查何路急需續進即飛檄貴州帶  
兵之員令其遄程馳往以資實用

臣等謹案軍營各路官兵數本不少惟豐昇額  
綽斯甲布一路兵力稍單是以臣阿桂酌請添



調黔兵以資合勦仰蒙我

皇上即降旨俞允並令體察情形或于功鳴當鳴兩路  
接續進攻以資聲勢厥後木果木有事所調黔  
兵適赴西路分布防禦軍心遂定此皆

聖謨深遠默運于事機未形之先非臣下所能仰窺萬  
一也

同日溫福海蘭察奏言臣等將昔崩山峯各碉日  
夜放砲擊打大半傾倒其從達扎克角山梁對面

拏卡之處官兵已逼賊番木柵前月二十九日林  
箐中突出二百餘賊來截後路官兵奮勇迎戰賊  
斃十餘本月初二日丑刻前進拏卡又有三百餘  
賊前來衝突官兵鏖戰殺退將及天明賊復從旁  
抄出官兵兩面合攻殺死亦多現在又拏卡七座  
未卡已與賊番木柵相距甚近仍每日施放火砲  
擊打臣等復查功噶爾拉山旁循山尚有小路從  
前原擬由此進兵因雪大改道今雪已漸化仰蒙

硃筆指畫訓示即是此路又達扎克角山梁有斜仄可  
登一路臣等共議於昔嶺達扎克角兩處每日照  
舊放砲擊打一面將各處兵丁通融抽出四千于  
本月初四日潛至該處詳看兩路情形何路容易  
即由何路進兵上攻烏嚕爾拉山口下壓喀爾薩  
爾奏入

上嘉之

壬寅豐昇額舒常奏言臣等前在東北高坡佔據

建立木柵高築砲臺即將新鑄大砲二位對準賊  
礮擊打牆根亦漸傾頽若即由此進取賊番預備  
抵拒頗須時日臣等再三籌畫並詢之熟悉兵役  
土兵稟稱珠孜寨對面有路盤旋而上尚不甚陡  
可與大營兩面合攻臣等親赴珠孜探看路徑雖  
係仰攻若能繞出背後自東向西攻擊與日旁以  
西大營兩面夾攻似為有益賊番此處一失乃其  
餘礮卡自然易潰臣舒常于是日馳回日旁挑選

漢土兵三千五百名派領隊大臣永平等於初日  
陸續前進并令達爾圖軍營于同日並舉以牽賊  
勢奏入

上諭軍機大臣曰豐昇額等奏稱現在籌畫分路進兵  
合攻要隘如此悲心籌辦佇望捷音近來各路進攻  
俱為冰雪所阻問之章嘉胡圖克圖云彼處四月十  
一日以後即不復有雪茲已交四月半自當日就暄  
和兵力更易施展溫福等惟當知金川不滅不休斷

無中止之勢努力圖功以成懋績

甲辰溫福奏言臣察看形勢若由現在烏什哈達等攻打之達扎克角前進則喀爾薩爾一帶之賊未經勦洗淨盡而遽欲順溝西繞越過昔崩山腿雖可通至色爾里寨但後路實有妨碍且此路溝深樹密砍伐固為賣力焚燒又有難行即攻過賊番大柵而前抵色爾里中間尚隔大柵數處臣等悉心籌議與其株守難進之柵柵不如覓路突擊

其不備之處現在海蘭察等已分帶官兵前赴功  
噶爾拉了口北邊前將蒙

聖明指示之路及臣近日所訪由達扎克角斜進之路  
詳加查探審度機會同時並舉使賊不能照應若  
此路官兵攻至喀爾薩爾則烏什哈達等所攻木  
柵亦可易破即或色爾里不能遽到而大兵一抵  
喀爾薩爾從此以東後路以淨各路齊力並進色  
爾里亦不難攻取

同日阿桂明亮奏言臣等前兩次進攻本注意納圍一路而於六七兩碉尤為用力賊番于此處必悉力固守其納扎木一路或防守稍懈乃三路並進似可易於得手因於本月初三日丑刻分撥官兵漸次潛進其東面之兵臨近碉根石崖陡峭潛密魚貫而上其繞出碉後之兵因緣崖一綫僅能接踵前行見碉後又有木柵一座木柵之下連接石卡五座官兵直前先奪木柵攻撲甚急見有騎



馬一賊率領二百餘人前來救援中鎗墮地官兵  
攻至申刻碉卡內賊番鎗砲更緊勢難即克因將  
兵漸次撤回我兵亦有陣亡帶傷者為數無多均  
奏入

上諭軍機大臣曰溫福等奏審度機會同時並舉所辦  
甚好各處分攻只須一處得手其餘自勢如破竹且  
了口攻克則進攻喀爾薩爾係向下壓施功較易而  
一得喀爾薩爾後路更可肅清又阿桂等奏稱攻勦

山梁礮後木柵當有騎馬賊人中鎗墮地其是否頭人著查明便中覆奏

同日阿桂奏言臣查縛斯甲布山險站長輓輸不易雖丹壩之糧運通行而打箭爐資隆之長運仍須協同輓送適值格爾忒土司差伊頭人來至當嚙爾拉軍營臣面飭該頭人傳諭土司令其派烏拉以供馱糧之用茲據按察使李世傑稟稱德爾格忒派出烏拉四千除資隆戩留五百外其餘三

千五百俱已至打箭爐一次即可馱運三千五百石等語臣查霍爾各土司內德爾格忒部落最大今既首先派出烏拉四千則此外各土司原出烏拉者必多且現當青草發生便於牧放番人得價受雇亦必更為踴躍奏入

上嘉之

丙午豐昇額舒常奏言臣等帶領漢土官兵三千五百名繞至日旁東面約定初三日子刻三路進

攻旋據東路侍衛彰靄報稱伊等帶兵前進俱係  
密林石坎陡險異常賊番聚集峰頂放鎗擲石數  
次官兵雖勇勢難驟上其由北面進攻之侍衛佛  
倫泰等報稱官兵乘夜進攻密林內忽有二三百  
人突出攪殺一處官兵將賊番殺死大半餘多帶  
傷滾竄又提督馬彪等報稱初三日黎明時督催  
官兵前進攻賊第四碉正在砍木填溝賊番即由  
左右兩路陸續接應我兵亦分兩翼迎截殺死賊

番二十餘名因賊漸次加添難以取勝即于巳刻將官兵土練撤回此次三處進攻所有陣亡及受傷漢土弁兵查明分別照例咨部奏入

上諭軍機大臣曰豐昇額等奏分兵攻打日旁雖亦殲戮賊番尚不足使賊衆畏懼至賊既能分頭來撲我兵何不能預為分頭防截看來官兵等未能得進不免稍懈豐昇額當設法鼓舞於激勵之中兼寓慰勞之意使衆皆感激奮勉以期于事有濟不必徒事催

迫也至日旁一路為進攻勒烏圍要隘自宜上緊攻  
打即或未能連進而有此兵力牽綴亦足分賊等之  
勢使之疲於奔命豐昇額等惟當相機妥辦不可稍  
有退懈

庚戌溫福海蘭察奏言臣等議定本月初六日於  
昔崩達扎克角功噶爾拉山口功噶爾拉山內小  
路四處一齊進兵其侍衛德爾森保等率兵齊抵  
碉根賊寨放鎗擲石防守甚嚴且地滑難以駐足

分隊撤回正緩行間有二百餘賊從樹林內突出  
衝截末隊我兵旋轉合擊殺死甚多餘賊受傷亦  
衆臣海蘭察帶領官兵來至功噶爾拉山口黎明  
前進見有二百餘賊憑高衝窺我兵奮擊殺死無  
數頃之復進殺二百餘自溝中來截後路我兵迎  
敵亦多傷斃至達扎克角地方臣令副都統烏什  
哈達等帶兵攻取賊番木柵當有小金川降番二  
名先登柵上其餘正欲接續而登而柵旁灌莽之

內忽有三百餘賊旋踵而來其護柵各礮又皆放鎗擲石合力抵拒暫時難以攻克將兵徐徐撤回

奏入

上諭軍機大臣曰溫福等奏官兵攻取木城時有小金川番兵二名先登上柵甚屬可嘉如此何以官兵反不能上登此二兵究竟如何或登城為賊所害或並無妨碍出來摺內並未聲明朕深為軫念著查明覆奏



同日

上又諭軍機大臣曰溫福等仰攻昔嶺現既無隙可乘  
即分兵夾擊亦屬無益且兵數既分不免單弱自當  
併力攻勦木柵則聲勢既盛攻取自易為力況木柵  
佔在山坡地勢尚屬平坦一取木柵即可直撲喀爾  
薩爾雖賊番堅守昔嶺亦不足慮或賊衆見我攻得  
木柵由昔嶺出而襲我正可乘其蜂擁而來預先派  
兵掩擊截其歸路著傳諭溫福詳酌妥辦

同日溫福奏言查屯兵善走山路與土兵無異因  
其籍隸流官不肯自儕於番衆實軍營最為得力  
兵臣不惜從優獎賞其本係額內弁員即予加陞  
職銜亦有本屬兵練遇事奮勉者即酌賞土職給  
與委牌以示鼓勵兩年以來受傷遣回調理者較  
別項兵丁獨多則其盡力已可概見近據該土弁  
等將得傷遣回已經全愈者復令赴營計有九十  
餘名即此更見伊等感激

國恩莫圖報効緣伊等原係雜谷土司蒼旺所轄之人  
前屬土司時差使繁重苦累自改土歸屯以來無  
事為民既得自安耕作有事為兵亦得支領鹽糧  
其隨營著有勞績者復得疊邀頂帶之榮賞卹之  
渥故其踴躍思奮出自誠心

同日溫福又奏言查近日到營之米多係商運臣  
啟奉

諭旨將立定章程稽查辦理之處現在札商兩督臣定

議會

奏至軍營各官兵應支口糧僅敷日食實無餘米可  
售臣仍當時為嚴密訪查不敢稍有懈忽均奏入  
上又諭軍機大臣曰溫福覆奏屯兵在軍營實屬得用  
自當逾格拔擢若僅予獎賞加銜尚不足示鼓勵屯  
兵既籍隸流官即與綠營相仿嗣後各路將軍等攻  
勦卡碉屯兵中如有實在出眾者即以綠營千把外  
委缺拔補一二人使其倍加感奮於軍務更為有益

至所稱軍營運糧之事乃總督專責著交劉秉恬富勒渾留心查察如有在營收買餘米之人即隨時嚴加懲治以儆其餘勿使稍滋奸弊如或視為具文致商人等不知畏懼別經查出惟劉秉恬富勒渾是問  
辛亥阿桂奏言四月初九日接准

上諭查屯練原係雜谷番人自誅滅雜谷土司蒼旺之後將其地分為梭磨後噶克卓克采三土司又將附近雜谷腦之五大寨不立土司改設屯練三千

隸維州協管轄伊等人本驍勁又自詡為

大皇帝番民不屑與土兵為伍故于打仗之處較為出力但該屯諫等既有應納之糧而三千願名之兵弁一年犒賞所得總計不過數百兩尚不足以深結其心且自進剿以來陣亡故者頗多情殊可憫以臣愚昧之見若於內地營分內量加裁汰即以所省糧餉每屯練一名月結銀五錢土都司守備並千把外委亦以次量給月餉計所裁不過守兵

一千三百餘名而屯兵得邀格外長年賞賚更可以堅其心而收其力奏入

上諭內閣曰現在隨征屯兵勇往爭先歷著勞績但念該屯兵等每年所得犒賞有限著加恩每屯練一名月給銀五錢其土都司守備千把外委亦以次量給月餉用示体恤其作何定數增給之處著劉秉恬富勒渾會商妥議奏聞

同日阿桂又奏言臣查川省徼外山險路窄豈容

以業經運出之糧一任奸商轉買交官充數上年  
臣于綽斯甲布土兵因其尚在本境所有應支口  
糧議令半本半折此固因糧運艱難起見亦以防  
贏餘私買之弊今自去春以來軍儲無缺商運之  
力為多但以數十萬石之糧運至數十站之遠其  
間原不能無弊臣前於乾隆十二三年間即聞有  
免收商運站上所餘之數作為商人應交之數私相  
貿易即以站上所餘之數作為商人應交之數從



中射利者臣現在雖無所見聞而有木池盤獲既  
奸商之事則此外各路不能保其必無嗣後惟在  
總辦糧務之大員及督臣於打箭爐木坪挑關雜  
谷腦等出口之處特派文武專員不時稽察按月  
出結具報則奸商自無從覓售而站員亦斷難滋  
弊奏入

上諭軍機大臣曰阿桂等奏稱前於乾隆十二三年間  
即聞有兌收商運站員因解回稍有贏餘遂與奸商

私相貿易從中射利者各路將軍皆帶兵進勦豈復能分心查辦此事昨因溫福奏及奸商收買踈役等餘米已諭交劉秉恬富勒渾留心查辦今阿桂所奏之說則更係大弊諛督等尤不可不切實該查從重究治

壬子豐昇額舒常奏言查近日賊番碉座石墻被大砲轟推殘燬見內有木植縱橫堆聚必須用火燃燒方能有濟而連日大雨如注木植透濕臣等

悉心籌畫若由正面前次所建之木柵向前再進賊番雖以亂木橫護而大砲愈近愈為有力臣等督令兵丁砍伐木植于本月初九日冒雨前進立柵一面令官兵分布以防侵擾一面令官兵各負貯土口袋堆築以為護鎗之具賊番惟在碉卡內放鎗死守亥刻後約有二百賊從南北坡旁兩股撲土均為分布官兵擊敗殺死約有數十餘俱滾竄至次日辰刻即將木柵立成俟天氣晴霽或

用火燒或不拘晝夜乘其不備潛往襲取奏入  
同日豐昇頌舒常又奏言三雜谷土司等與金川  
素係兒女姻親茲據副將李天佑送到自金川脫  
出兵丁楊啟龍臣等反覆細詢據稱卓克采有通  
金川之路金川防守尚未嚴緊但不知是何隘口  
地名等語查該處既有路可通金川難保土司等  
不符潛相往來洩漏消息且恐逆酋窮蹙時由彼  
竄逃均未可定是該處必須撥兵防守以杜其潛

通信息並防其竄逃之路臣等密札五福令其就近詳細妥給均奏入

上諭軍機大臣曰賊番等守拒要隘於礮眼放鎗抵禦雖所用火藥不及官軍鎗砲施放之多但為時已久安得如許火藥供用恐係隨營土練守私自賣給賊中現據豐昇額等奏稱卓克采有通金川之路番人彼此交通往來勢所必然不可不設法嚴防至軍中火藥關係最要各兵支領之藥或有餘存不可令其

偷給土練等轉售賊中著溫福阿桂等悉心妥酌具  
奏

丁巳溫福海蘭察奏言臣等自達扎克覺山梁進  
至附近賊番木柵之地造立砲臺轟擊又潛越賊  
番木柵分立卡座本月十五日早間樹林內有賊  
百餘分為三路前來侵擾經烏什哈達阿爾蘇訥  
等帶兵攻擊殺死十餘又十六日亥刻賊由大樹  
林內匍匐前來衝犯砲臺官兵四面迎擊殺死多

賊又本月十三日總兵牛天昇報稱初十日戌刻  
天陰霧大功噶爾拉山口有賊三四百人已奪南  
首山梁木卡正在攻圍其次卡座官兵前進接應  
內外合攻殺死二十餘賊餘皆四散奔潰其所奪  
卡復為我兵佔住臣等查功噶爾拉山口及昔嶺  
達扎克角俱係賊番抵死堵禦之處今敢乘夜滋  
擾更為可恨臣等每日用砲轟擊賊番木柵以及  
碉卡斜牆視何處有機可乘即行進攻奏入

上諭軍機大臣曰溫福等奏稱賊眾數來侵襲累接大  
戰俱僅殺賊十餘賊番既出深叢往來猖獗我兵何  
不奮勇洗殺即使狹險難進綠營兵於此有所弗能  
現有索倫額魯特及土練等兵溫福等何不用之著  
傳諭溫福阿桂等務各相機籌辦以期痛勦

同日

上諭內閣曰前因李煦捏報軍情降旨將伊革職審訊  
其貴州提督員缺諭令溫福等於隨營出力之總兵



內揀員陞補今據溫福奏以川北鎮總兵牛天畀暫  
署貴州提督事務牛天畀著陞署貴州提督所有在  
營黔兵即今統領管轄

平定兩金川方畧卷五十九

欽定四庫全書

平定兩金川方略卷六十

五月己未

上諭內閣曰進勦金川官兵內間有陣亡傷亡者雖經  
交部從優議卹但伊等俱歿於王事而所遺家口養  
贍無資著交各督撫提鎮查明如有子弟即令頂補  
名糧其並無子弟親老丁單者給與半餉以示體恤  
該部即遵諭行

庚申豐昇額舒常奏言臣等建立木柵逼近賊碉  
于十七日夜潛進至十八日丑刻賊番密從箐林  
抄出官兵俟其將近鎗礮齊施殺死六七十人餘  
皆奔竄官兵緊追賊番逃躲無路多有跌落陡坡  
崖下者黎明拏成木柵一座更與碉卡逼近賊番  
因被痛殲俱匿碉內壕中死守不敢露影奏入  
上諭曰勉力前進佇候捷音

辛酉阿桂明亮奏言臣等旬日以來察看賊番因

屢次潛匿林箐均被官兵設伏截殺是以附近處所不敢前來惟距大營稍遠深林複嶂官兵不及望之地尚有窺探踪跡臣等派撥漢土官兵分隊潛往散布於山坳林莽遇賊即殲茲據小金川降番頭人阿咱拉回稱十五日越過山梁直至喀爾薩爾對過之沙圖角地方遇有打柴兩賊當將一賊俘縛其一賊踉蹌逃去時值大霧林中突出賊番二三十名前來接應思欲奪回當被官兵等將

所縛之賊殺死其接應之賊亦被鎗擊死四名餘  
俱竄去臣等查當噶爾拉山梁綿亘二三十里官  
兵所設營壘處處與賊碉相對東通功噶爾拉喀  
爾薩爾西通克舟九寨均有賊碉林立據守此等  
山嶺之上溝澗之旁均須分兵駐守如有兵三四  
千名連營而下層層接應繞出賊碉後則賊必不  
能固守又臣等體察賊情此兩三月以來不過因  
雨雪過多官兵難于行走得以稍延殘喘其實此

一道山梁地勢延長萬萬不能久為支禦而以臣等自揣亦必能即從此攻壓前進一俟雨雪停止自可剋期深入奏入報

聞

甲子溫福海蘭察奏言臣等於本月十九日領兵遶過木柵前進夾攻賊番于十九二十兩日潛出滋擾均被官兵截殺多人望風奔竄從此又立九柵至達扎克角官兵往返二十餘里下溝取水甚

艱茲于二十一日見賊番即在木柵前取水官兵  
齊出衝擊殺死守泉賊衆因即佔得此泉現今取  
水甚便至二十三日昧爽臣等分兵兩路直至賊  
犯所挖深溝之上賊番驚覺從孔穴中擲放鎗石  
昔嶺上又有救援賊番迤邐而下為官兵大礮擊  
回其溝內擁出之賊亦被官兵奮勇截殺四散奔  
逃頭等侍衛巴雅爾藍翎侍衛岱森保被傷俱各  
無碍奏入



上諭軍機大臣曰溫福等奏稱攻取昔嶺情形及奪獲  
達扎克角水泉所有受傷之頭等侍衛巴雅爾著賞  
給副都統銜藍翎侍衛岱森保著授為三等侍衛再  
賊衆恃其碉卡堅固敢與我軍抗拒實為可恨但山  
勢既險又遇雨霧我兵既不能前進而賊番又匿於  
碉卡之內雖鎗砲擊轟徒費鉛藥不如虛為進取之  
勢且令我兵稍為休息遇有機會突然進勦方於事

機有益

同日

上諭內閣曰阿爾蘇納頭等侍衛員缺著伊里布補授  
伊里布所遺二等侍衛員缺著新達蘇補授新達蘇  
所遺三等待衛員缺著岱森保補授其岱森保所遺  
藍翎侍衛員缺著達蘭泰補授

同日豐昇額舒常奏言臣等察看賊礮已被大砲  
摧毀僅恃木植堆積藏匿距守惟是近日陰雨晝  
夜淋漓臣等不勝焦急即于二十一日選派官兵

戌刻潛赴新拏木柵至二十二日丑刻雨中突然  
撲出賊番知覺雖不敢露身抗拒均于碉卡孔穴  
之內放鎗擲石甚為緊密臣等督催官兵撲至木  
植堆積之處拋擲火彈因木植沾濕不能燃燒遂  
明撤前隊官兵而潛令繼進官兵繞往賊番碉後  
覓路爬登又令官兵將大砲鎗箭預為齊備賊番  
希圖冲壓一齊撲出官兵施放連環擊斃約有三  
十餘人

同日鄂寶奏言四月十三日戌刻覺木交地方有  
夾琪潛來該哨兵丁知覺合力往追賊即繞林而  
去逃遁無踪臣親往查勘該處山勢險仄林樹叢  
深是以賊番敢于前來若將林木砍伐則難以潛  
踪我兵亦易瞭望因派撥兵夫于緊要處所併力  
芟除仍飭令哨兵加意防範不得稍有疎懈奏入  
報

聞

乙卯阿桂明亮奏言當噶爾拉山梁自二十一日以後雲霧迷漫大雨滂沱至二十六日晚始見開朗賊番即於亥刻後潛來侵擾革布什咱營盤土兵先已望見滅火靜候俟其來近突然冲殺賊俱踉蹌奔竄因黑夜打仗未知殺賊多少二十七日卯刻臣等又令前敵各官兵預為埋伏而令革布什咱土兵由南面山溝內潛繞至東面大崖之下賊見兵無後繼蜂擁而出山梁各碉內賊人亦出

碉下壓革布什咱土兵回身接仗而預伏官兵亦突起截殺共斃二十餘人餘賊仍竄入碉內死守同日阿桂又奏言竊臣于四川邊外各土司及金川賊番光景兩載以來日夜通盤籌算金川獷悍性成附近各土司久已為其挾制畏之如虎即如去夏之派調三雜谷土兵去秋之派調綽斯甲布土兵皆屬首鼠兩端直至攻克小金川巢穴之後始肯實力助攻是金川原有不可不辦之勢況金

川賊衆此時已儘數出兵鎗砲所傷日少一日又  
加以綽斯甲布三雜谷巴旺布拉克底諸土司斷  
絕往來與十二三年間情形迥別且賊衆均已出  
兵婦女又須背運必不能多種庄稼則口糧更當  
缺乏合此數者金川掃蕩之數雖未可先期預定  
而斷無不滅之形實于此可見臣以兵凶戰危從  
不敢稍存自誇之念且併不預為滿足之言然金  
川之役深知其必不可不辦又確信其非不能辦

何肯意存遷就均奏入

上諭軍機大臣曰阿桂奏近日天氣已晴官兵自更易于用力溫福豐昇額兩路諒亦相同進攻若何深為厯念又阿桂奏覆征勦金川一事現在既有必不可辦之勢又無不能辦之形所見甚是帝王固以仁育為量若當不得已而用兵則義正即所以成仁豈可專務煦妪流為姑息至現在府庫充盈前後所撥軍需至二千四百萬兩而庫貯尚有七千餘萬此時



惟期勦滅金川為衆番除害以莫邊隅即多費軍需亦所不惜溫福等當深體朕意俾衆將士及各土司咸得聞知共相奮勉迅奏膚功以膺懋賞

同日劉秉恬奏言土兵隨營進勦服色與金川賊衆相同自應給與號衣使一望而知稽查甚易至屯兵一項雖與漢兵不同究與土兵有間應每名各賞給紅面藍裏短挂背後填寫該兵姓名如此不特易于識別亦且行伍整齊足以壯聲威而便

勦擊現飭軍需局上緊製辦分解給發俾各士兵  
等服色一新益勵其效順急公之志自必倍加鼓  
舞奏入

上嘉之

同日劉秉恬又奏言臣察看當噶爾拉山梁一道

自東而西綿亘約數十里我兵現已佔據山梁所  
駐營盤與賊番碉卡相間雖仍抵死相持其勢已  
不能聯絡若再攻得數碉便可掃淨山梁易于得

手至去歲由僧格宗至美諾山徑逼仄最險之處  
步行亦須牽挽經臣

奏明派員修治並將道路改至河西現在人馬往來通  
行全無阻隔奏入報

聞

已已豐昇額舒常奏言臣等于二十四日夜派出  
前隊官兵從新孛木柵之內各執火彈柴捆撲至  
頭層溝邊砍斷外欄即將柴捆填塞爭先過溝拋

擲火彈燒其堆積木植因被久雨濕透不能焚燒而奮勇兵丁已將所堆之木或掀或折踴躍騰上但木堆內又有深澗濠溝一道底積淤泥未能徑越我兵鎗箭密施良久見賊番立斃受傷者甚多但賊在溝內放鎗擲石我兵排列明處不加損傷且自己至午雨無霽象而賊番匿身死守是以將兵撤回此次接仗侍衛明仁腮受鎗傷其餘陣亡及受傷漢土弁兵照例咨部奏入

上諭內閣曰豐昇額等奏稱攻擊賊碉二等待衛明仁受傷著補授頭等待衛

又

上諭軍機大臣曰各路節次所奏情形俱有賊番藏匿溝內放鎗之語賊番所藏溝內則鎗向上放不能得準傷人此乃一定之理若賊欲認準施放則其頭面必露我兵即可用鎗箭擊射何至竟付之無可如何再賊在溝內官兵若平面迎擊則自上而下勢固難

及設于溝濠兩頭順溝轟擊賊復何由遮掩何以各路軍營俱未聞如此辦及著傳諭溫福等知之

辛未

上諭內閣曰現在三路進攻金川節次撥過軍需銀二千四百萬兩約計十月間尚足敷用但寬裕儲備更為有益著戶部再撥庫銀五百萬兩解川存貯備用  
同日溫福海蘭察奏言二十八日丑刻有三四百賊番來犯新豎木柵臣等先已於兩旁設伏至是

伏兵齊出殺賊甚多今共建木柵七座砲臺一座  
攻打賊番石牆比賊較近賊番盡聚此處防守二  
十九日戌刻有賊百餘由此溝來犯前哨木柵數  
次俱被官兵擊敗再副都統阿爾蘇納等駐兵建  
造木柵二十八九兩日有賊番三四百名屢次來  
衝被官兵殺死甚衆又總兵牛天昇報稱四月二  
十七日子刻有賊百餘由功噶爾拉山後犯我木  
柵官兵殺賊十數名餘俱被傷奔竄奏入報

聞

癸酉阿桂劉秉恬奏言德爾格忒土司魯珠布甲  
木錯遣其頭人色楞等來稱我土司自來恭順今  
各土司俱受

大皇帝深恩賞給名號花翎我土司亦求將軍轉懇

天恩等語臣等查德爾格忒現有土兵五百名備轉運

糧之用又派烏拉四千頭以資馱載頗見急公伊

係霍爾諸部落中最大土司今懇



賜名號花翎情詞諄切如蒙

特予榮施該土司必倍加奮勉

同日劉秉恬奏言簇拉角克坐卡兵丁盤獲梭磨  
回巢番民阿綑一名又卓克采回巢番民納木喀  
鄂特德爾二名共帶有大小鉛丸四百一顆鉛餅  
兩塊臣當即親提嚴訊鉛丸為軍火要器豈容番  
民等任意攜回既經查拿自難寬縱但無賣與金  
川實跡因將各番嚴行看守譯諭該土司等自行

議罪俾所屬番民共聞共見即各處土兵應必共  
知傲懼均奏入

上諭軍機大臣曰阿桂劉秉恬會奏德爾格忒土司應  
賞給花翎名號德爾格忒不過辦運烏拉乃土司職  
分之常若遽加優賞與陷陣冲鋒者相等未免漫無  
區別且前此紅教喇嘛縱令在夾爾塘居住滋事尚  
未辦及當傳諭該土司如能將紅教喇嘛嚴行管束  
永不往來滋生事釁庶見爾誠心恭順或可奏聞大

皇帝施恩此時不便即為噴奏如此方為正辦又劉秉恬奏盤獲梭磨卓克采回巢番民三名帶有鉛丸鉛餅令該土司等自行議罪等語所辦過于姑息此等關係軍火重情敢于違犯皆當決不待時即或念土司等恭順出力亦當諭以例禁甚嚴不能獨為番民輕減使之益切畏懷豈得稍事遷就

同日博清額劉秉恬奏言查功噶爾拉營卡被賊搶劫李煦常保住捏報係小金川鄂克什換班無

賴窮番乘夜滋事一案臣等委令牛天昇等就近  
提訊當日在卡弁兵據稱三月初三四日前後並  
無小金川鄂克什換班之人且賊人內半穿白色  
衣服頭髮俱長似是金川賊衆查失事地方對面  
山梁賊卡可下之處頗多或乘黑夜搶劫亦情理  
所有等語臣等復質訊失事卡內防禦德祿等俱  
與牛天昇所訊無異質之李煦常保住惟有叩頭  
認罪不能置辯查律載守邊將帥不將實在情形

具奏玩視軍情者擬斬立決應請

旨將李煦常保住二人即行正法奏入

上諭軍機大臣曰博清額劉秉恬奏查審李煦常保住一案僅憑總兵牛天昇所查情節並防禦德祿等供詞究係揆度之詞朕斷不肯以莫須有之事遽加二人以重辟李煦等罪名不在賊番搶劫營卡而在事後捏報賊番偷劫營寨本其長技若李煦等據實報出其過止於疎懈且據稱查得閏三月初三四日前

後並無小金川換班之人以此嚴切詰責令李煦等切實供明使之毫無疑義然後可定罪名博清額著再會同劉秉恬審明具奏

乙亥豐昇額舒常奏言臣等思宜喜日旁皆金川緊要隘口賊番抵死拒守若待相機而動徒延時日現在節近端陽各土兵皆知為內地佳節臣等擬于初四日夜間密派官兵于初五日黎明前往進攻可以擊其不備再提督馬彪等稱宜喜軍營

逐日取柴汲水恐其路遇夾填每令兵丁先行巡哨茲于二十七日見林內有二百餘賊即時接仗殺死十數人等語奏入

上諭軍機大臣曰豐昇額舒常奏稱現在相機攻取亦只可如此辦理前經傳諭調撥黔兵二千原因豐昇額等一路兵少是以添派今思此路似難急進即多兵恐亦無益著豐昇額於黔兵到營後即行奏聞再春寧今日到熱河詢及軍營形勢據奏溫福所立營

處相距賊礮不遠柵內砲子竟可打到等語甚屬非  
宜將軍膺專閫重寄關係甚大即身先士卒不過親  
履行間指揮策應不當與前茅一律先軀為衝鋒陷  
陣之事至於不避矢石冒險直前在弁兵等自當鼓  
其勇銳之氣然亦應權其利害即領隊尚不可令輕  
有損傷况將軍乎溫福一路如此恐他路亦然溫福  
阿桂豐昇額等凡一切進攻事宜留心加慎須于奮  
勇一往之中仍存慎重萬全之意



臣等謹按將帥任膺專閫自當躬先士卒以厲料  
而鼓其勇銳尤必權其利害伏讀

聖諭因溫福一路立營逼近賊碉慮及他路明切  
訓誠務出萬全使溫福等能恪遵

勝算何至有木果木之失事而

睿慮所周一籌而仁智勇之兼備則又在事諸臣莫能  
仰窺萬一者矣

丙子阿桂明亮奏言臣等查西山梁第三碉山陰

之下有山腿一道賊番連拿木柵石卡直接梁上大礮互為應援防守甚密但攻得此處礮柵餘皆不能固守因派撥漢土兵丁分為四路於初二日丑刻潛行進發至卯辰之間雨勢大作徑陡泥滑因令官兵徐撤其納扎木官兵撤回之時有賊二十三人出礮衝壓當被官兵擊斃數人餘仍入礮死守至初三日有百餘賊出礮下壓臣等派兵分為兩翼抄出賊後奮擊亦斃數人賊始奔竄初五

日衆賊番以為節屆端午大兵必不前來攻撲或  
可因其不備當派各路官兵奮力前進過濠直至  
礮根其侍衛科瑪所帶官兵並用刀斧將木柵砍  
斷一角推倒石牆衆兵一擁而入立將頭人砍死  
餘則悉行殲戮生擒賊番六名殺死四十三名官  
兵勇氣倍加乘勢攻撲相連石卡復殺賊二十餘  
人其山陰林箐中藏匿之賊約有三四百人分作  
五路捨死來援我兵分頭迎擊賊番力不能支遂

竄入碉卡之內併力死守鎗石如雨勢難遽克官  
兵以次撤回至撤兵時有二十餘賊出碉奔至壕  
邊官兵鎗箭齊發立斃一半餘賊欲拖尸回去有  
貴州把總張順獨自躍過壕溝用矛刺死一賊復  
拔刀手砍一賊餘賊皆遁入碉查賊番於此各碉  
實為盡力死守而我兵因奮勇直前得以多行殲  
戮稍覺稱快此次陣亡虎鎗營前鋒官德一員受  
傷三等侍衛科瑪袞楚克空藍翎額魯特阿爾

查鄂爾哲伊貴州守備詹玉書瑚圖禮共五員奏

入

上諭內閣曰阿桂奏稱此次帶兵攻奪卡柵殺賊衆  
所有出力奮勉之三等侍衛科瑪著補授二等侍衛  
藍翎侍衛袞楚克著補授三等侍衛空藍翎額魯特  
阿爾查鄂爾哲伊俱著補授藍翎侍衛至虎鎗營前  
鋒官德陣亡著交該部照藍翎侍衛例議卹

上又諭內閣曰貴州把總張順於鎗石如雨之時躍過

濠溝連殺二賊實為奮勇出色著即補為千總又守  
備詹玉書瑚圖禮因攻勦碉卡受傷俱著加恩以都

司陞用

同日阿桂明亮奏言竊臣等接奉

廷寄查金川地方硝非難得惟不能處處產磺前年  
金川侵佔革布什咱其境內之默資溝為出磺之  
地賊酋遣人剗挖甚多製配火藥則其存積自未  
用完至屯練土兵軍器刀矛擊刺固其所長而鳥

鎗更為素習出入必攜之以行施放頗為有準此時若遽令其不用烏鎗不但番衆生疑而伊等於攻奪碉卡之處止能短接而不能及遠轉恐難於得力但防範不可不嚴臣等復飭將弁益加設法嚴防又飭令駐扎吉地之副將鄭國卿將默資溝地方時刻嚴查不許一人私挖如有透漏嚴參治罪奏入

上諭軍機大臣曰前此因軍營火藥關係緊要恐番衆

私相售賣諭知各路將軍此後土兵毋庸給與鳥鎗  
今據阿桂奏所見亦是此事原當慎之於始從前既  
已遍給此刻自難復改溫福等于各路仍照舊辦理  
但須留心實力嚴查不可泥于土兵愛惜鉛藥之一  
言遂爾漫不經意致令私售作奸

同日阿桂明亮奏言查當噶爾拉一帶山溝林箐  
深密四月三十日早間大霧迷漫有賊十數人潛  
放夾填官兵久經預備俟賊將近上前迎擊鎗傷



數賊餘俱驚駭踉蹌而去其占朋一名被屯練拿獲屢經嚴鞫據稱四月內官兵來打山梁碉卡有思都克覺寨頭人溫布薩爾嘉被官兵鎗傷墮馬衆人救回等語臣等查四月初間打仗中鎗墮馬賊人仰蒙

諭旨垂問正在查訪茲據賊番供係溫布薩爾嘉是金川最會打仗頭人奏入

上嘉之

丁丑

上諭軍機大臣曰前據各路軍營查奏節次逃入隨交  
富勒渾上緊查拿茲據富勒渾奏稱現據各屬拿獲  
二十名是各處逃兵俱可陸續就獲斷不致漏網稽  
誅而已經弋獲之犯軍紀所係法在必申亦不能因  
人數稍多曲為寬減隨征兵衆聞之自應各知畏懼  
現在各路有無續報脫逃溫福阿桂豐昇額等一併  
查明據實覆奏



平定兩金川方畧卷六十

欽定四庫全書

平定兩金川方略卷六十一

五月戊寅

上諭軍機大臣曰各路軍營隨征土兵雖亦常得其力但究係番衆難於深信伊等不過隨官軍一體出力特以番人効力因而逾格撫循斷不可稍露一切專仗土兵之意使若輩驕矜視官軍為不足畏況每次攻勦時率衆爭先原不專藉各土司兵練將軍分路

派兵須酌量配搭而用勿使伊等自負其能又不宜漏洩端倪令涉疑猜怠於勇往此事甚有關係不可不加以審慎又前經降旨將屯兵增給月餉均知感激奮勉伊等原係降番改隸與兩川言語相通何不於中擇其曉事數人諭將伊等受恩之處作為屯兵之意傳播賊中可以離散衆心俾無固守之志或亦用間攻心之一策着傳諭溫福等知之

臣等謹按雜谷屯腦兵原係番人自改隸屯伍

復增給月糧幾與內地綠營無異在番人見小  
貧得感激思奮雖亦稍資其力而率先鼓勇原  
仗我官兵聲勢豈可使之稍萌得意尤不可因  
此令涉疑猜伏讀

訓旨曉示機宜至周且悉又即屯兵受恩之深施用間  
攻心之策俾舊隸者爭先用命而未降者慕順  
傾心益以仰

聖神之妙用無遺也

辛巳溫福海蘭察奏言臣等思達扎克角一處與昔嶺賊番互為救援必須兩面進兵則番不能策應是以公同商議於初七日丑刻將攻取達扎克角之兵分為三路其攻取昔嶺各碉之兵亦於是日丑刻各抵派定所攻之地其由昔嶺左首進攻者逼近碉外溝邊賊番並未知覺我兵拋進火礮燒斃多人其出而拒敵之賊殺死無數比及天明大雨如注正在徐收各路之兵右首溝內有賊數



百來截後路我兵迎戰擊死亦多餘向樹林奔逸  
同日豐昇額舒常奏言臣等於初五日子刻督兵  
分隊潛攻將至半途賊已知覺放鎗擲石甚緊臣  
等以久持無益將正路官兵先行撤回有百餘賊  
由山梁北邊繞下計圖追捕即被林內預備官兵  
殺死十數人餘俱逃竄又提督馬彪等稱是日密  
派兵前往放哨一進林內忽聞山梁礮響約有四  
百餘賊來將弁兵圍住該將弁等放鎗拒戰正在

極力相持馬彪即派兵丁接應衝散賊人殺死三十餘名均奏入

上諭軍機大臣曰溫福豐昇額等奏派兵進攻情形均未得手且兩處俱有賊番潛出林箐邀截我兵實為可恨金川人戶無多各隘守拒已覺踟蹰焉得復有餘衆每處四五百人出而滋擾似係守拒之賊見何處攻擊稍踈抽移外出分力支吾看來金川賊衆竟有算計不但守碉截戰較小金川悍惡且敢於到處

抗拒王師比之緬賊更堪切齒但其地縱多雨雪晴日自長並非以緬地之水土惡劣難於措手若欲如緬事之中輟斷乎不能亦斷乎不可將軍等其深體而實勉之

乙酉阿桂明亮奏言臣等查當噶爾拉一路漢土官兵本有萬餘但現除陣亡病故之外其養傷患病者已有千餘而後路綿長處處皆須防範此時實無可抽撥臣等每次打仗極力酌撤不過得兵

三四千名。今若從山梁中間連營而下，則打仗之兵甚少。防範之處愈多，轉與攻勦無益。臣等思當噶爾拉一路實為可用多兵之地，果其兵力充裕，即臣等一路竭力奮攻，亦能早為深入。但現在各路所調官兵為數已多，若再請調未免仰煩。聖慮是以未敢遽行瀆

奏奏入

上諭軍機大臣曰：阿桂等奏稱當噶爾拉一路後路綿

長處處皆需防範其說不免過當後路固須留心防  
守然亦宜擇最要之處酌量安兵況深巖密菁之中  
賊番可通路徑甚多豈能隨地密為分布以金川壤  
地計之周圍不下三四百里若欲悉派兵圍守必至  
如古人動輒用兵百餘萬及數十萬而後足敷分派  
有是理乎再近因辦理四庫全書所閱永樂大典見  
其中有宋陳規守城錄一書備載守禦機宜所言禦  
捍礮石之法甚詳雖攻守不同而禦捍則一但彼施

之於城上故可用大木我兵步行捍敵自以輕便為  
宜從前該省原有攬牌一項或製造未能得法今此  
書所載以麻繩橫編如京竹筴相似頗得以柔禦剛  
之法或可酌倣為之著將書載各條抄寄各路將軍  
等閱看將來攻至噶拉依及勒烏圍兩處尤為賊巢  
要隘其守拒必更加嚴或可需用之處不妨存此法  
以便緩急

同日阿桂明亮奏言臣等檢查舊例自前年八月

進勦小金川官兵欽奉

恩旨議叙者尚有未經送部之案其陣亡帶傷例應請  
卹者前任統兵總督從未辦理送部臣等思陣亡  
帶傷各官兵本屬衆所共知其受傷弁兵從前業  
經驗明每名皆先給銀一二兩以為養傷之用則  
得傷輕重均有檔籍可稽不致冒濫現在臣等復  
令各鎮將等詳悉確查送部核議庶在事陣傷亡  
故之官兵均沾

體卹倍加感奮奏入報

聞

丁亥劉秉恬奏言查川省官兵除調赴三路軍營之外存營者寔屬無幾所有陣傷亡故各缺均以新兵拔補川省本無餘丁近日所出之缺已有移回原營補額者第募補兵額不過以缺數充兵數虛糜錢糧於營伍實屬無濟臣擬於口內口外一帶先行招募精壯新兵五百名前赴簇拉角克每



日督令教習技藝以資拔補額缺至前歲所募新兵緣係甫經入伍未及操練今令預期選派前來時加簡閱則勇銳之氣方新攻擊之能漸熟如果辦有成效臣再酌量所缺兵數續行招募演習以收攻勦之利則兵數不致濫招兵力皆歸實用於軍務似為有裨再該兵等未經補額之先有防守之責其應得銀米即照前歲新兵之例一體辦理

奏入

上嘉之

六月辛卯溫福海蘭察奏言臣等十五日派副都統普爾普由山梁新擊之卡攀援先登至橫牆左近掩攻副都統額森特等亦由山梁新卡越過山溝前進臣海蘭察等分兵二隊於十六日子刻俱各起程普爾普潛至橫牆礮根左近賊衆知覺放鎗擲石又經大雨泥濘難上撤兵而回維時臣等先將攻取橫牆日期密諭阿爾蘇納等同刻進兵

攻取對面山峯賊柵亦於十六日黎明分作三路  
前進賊番放鎗擲石迎拒尤為緊密官兵毫無退  
避殺賊甚多惟因木柵甚固地勢甚狹我兵緩行  
撤退有賊二百餘人從林繞出來斷歸路官兵併  
力上前殺死賊番十餘山溝內又有二百餘賊前  
來衝突亦殺死十數名餘賊盡皆遠竄再提督牛  
天昇等請於是月十六日進兵攻取功噶爾拉山  
口臣等即派副護軍叅領巴彥泰帶兵往助今據

牛天昇報稱是日丑刻帶兵前至賊礮遇有二十餘賊官兵迎擊掩殺大半礮內賊人知覺死守天明撤回奏入

上諭軍機大臣曰溫福等奏攻勦昔嶺及達扎克角木柵均有賊出寨邀截官兵是賊番竟敢公然打仗實為可恨必當勦洗淨盡不可稍有游移至軍需銀兩共撥二千九百萬兩約計用至明年四五月儘屬寬餘設或以多費為可惜中止撤兵賊必併吞各土司

聯而為一直關至維州橋其時豈能置之不問是現  
在所用盡為虛擲又須另起爐竈所費必更不貲而  
辦理倍難謀國者斷不應出此即或急切不能藏事  
但能掃蕩擒殲為一勞永逸之計即使再費一千萬  
兩朕亦不靳溫福阿桂豐昇額等各宜體朕意

同日

上諭軍機大臣曰溫福等請將烏什哈達所遺頭等侍  
衛員缺著額爾特補授其所遺二等侍衛員缺著寧

珠布補授寧珠布所遺三等侍衛員缺著庫爾德補  
授庫爾德所遺藍翎侍衛員缺著獎賞花翎前鋒綽  
爾齊喀補授再海祿所遺前鋒叅領員缺著巴彥泰  
補授巴延泰所遺副護軍叅領員缺著愛崇阿補授  
愛崇阿所遺委署烏鎗護軍叅領員缺著常通補授  
常通所遺前鋒校員缺著烏鎗藍翎常達崇阿補授  
又柰拉爾圖所遺護軍校員缺著空翎護軍雙喜補  
授等語均照所請各該營旗遇有缺出即行調補

上又諭軍機大臣曰現今三路官兵攻取賊番碉卡奮勉出力自當將花翎藍翎分別獎賞用昭鼓勵其從前賞給備用者料已無多溫福阿桂豐昇額三路著各給花翎五枝以備賞賜

上又諭軍機大臣曰富勒渾奏黔兵未起已於五月十八日到成都令其赴明郭宗聽候軍營調撥等語明郭宗至昔嶺甚便自應添撥往彼俾得尅期集事再富勒渾奏前次擊獲逃兵二十名現已審明正法令

又續獲五名等語逃兵就獲駢誅至二十餘人亦覺  
不忍然因此稍為姑息則兵丁不知儆畏犯者愈衆  
劉秉恬富勒渾仍須上緊嚴拏勿謂朕意在好生稍  
為寬懈也

乙未富勒渾奏言據站員洪成鼎報本月十九日  
至二十一等日大雨如注山水陡發該站之木橋  
索橋及東岸河坎盡被沖坍現在飛調夫匠星夜  
趕修恐一時驟難告竣文報往來趕辦溜索接遞



仍於對岸暫撥夫馬伺候遞送等語又據統領黔  
兵副將五福稟稱本月二十日夜頭起黔兵抵格  
節薩站山水漲發兵丁間有淹沒軍裝行李亦多  
沖失臣即飭將備等於所到處所暫行分住並飛  
札站員分段趕修橋道其被水商民兵夫人等酌  
加撫卹現在親赴格節薩站履勘情形奏入

上諭軍機大臣曰軍報往來最關緊要且有新添之兵  
正需速進自應趕修完固務使軍儲源源接運黔兵

得利遄行方為妥善至所調黔兵二千名俟橋道修完即令迅速前赴昔嶺軍營毋得刻緩

上又諭軍機大臣曰富勒渾奏頭起黔兵夜間被山水淹沒已諭富勒渾查明被淹姓名咨部照陣亡例減半撫卹其漂流軍裝行李亦令查明添補此等為國出力之人自當予以體卹但恐狡黠之徒水漲時躲藏待水退後漸行竄回是其情罪即與逃軍無異除逗遛川省者富勒渾上緊嚴緝外著圖思德於各兵

本營本籍嚴飭各地方官留心密跡

丙申阿桂明亮奏言臣等思西山梁第三碉卡前此官兵攻打殺戮頗多賊番已覺窘惶自應乘其氣沮仍從此奮力撲攻當於十四日夜派兵四路十五日丑時先後潛進直逼碉卡木柵力砍溝邊攔木即以砍斷木植橫塔溝上以便越過卯刻有賊番三百餘繞截而來官兵放鎗立斃數賊其納圍後面東邊箐林內又有賊百餘潛來我兵俟其

將近鎗箭齊發殲斃二十餘人臣等復同籌議西山梁第三碉賊番拒守更為堅固自應另籌攻取之策查納扎木弟二碉與第三碉之間賊番又添大石卡一座若黑夜添兵直取此卡出其不意一得此處可以斷賊往來至第一雙碉陰坡之下又於箐林內蹊有小路可以繞越雙碉之後臣等擬於西山梁及納扎木仍派官兵奮力明攻而令繞越之兵俟攻打緊急時突起夾攻可望得手現於

附近第三礮之處連擊木柵三座使賊日夜不能  
休息而我兵不拘何時可以一發即至賊番自必  
更為窘迫奏入報

聞

同日阿桂明亮奏言當噶爾拉山梁陰坡正西有  
深嘉卜一處係布拉克底地方與金川接壤若派  
兵潛往循溝而出即可襲取山梁後之克舟九寨  
臣等擬於軍營內抽出精銳官兵三四千名密由

深嘉卜統出乘其不意再向僧達一帶分路攻打則賊番腹背受攻必至顧此失彼易於克取查軍營兵力本不敷直下山梁之用今經抽撥難免力單且深入後亦須隨衆之兵臣等仰懇

天恩將新調黔兵二千名撥給當噶爾拉一路則繼進有兵攻取益為得力

同日阿桂奏言臣查三雜谷土司派兵助勦近日頗為出力而卓克采之女已經亡故親情斷絕因

思三雜谷地方毗連丹壩總兵五福在彼駐扎與  
其坐守該處不如酌派丹壩及雜谷土兵乘其無  
備之時突往襲取如能搶得一碉一卡固可張揚  
聲勢即兵力不能佔守撤回亦屬無妨如此則賊  
番不能不分兵防守亦可牽綴其勢因諭該頭人  
等令聽五鎮調用均稱情愿領諾而去如果三雜  
谷及丹壩土兵能乘間攻打一兩處則賊酋之勢  
必分而三雜谷丹壩各土司益得驗其無往來勾

通之弊均奏入

上諭軍機大臣曰僧達一路朕於春間檢閱全圖時覺其地勢稍平且距噶拉依相近曾經指示自應乘此機會妥協籌辦至所調黔兵二千已全赴溫福軍營備用今阿桂現辦統路進攻即照所請准其調取應用阿桂於黔兵到後即應奮力勦擊乘勝突入設或仍係相持多延時日則阿桂又當分撥一半令速赴溫福軍營以供分勦之用總之所調黔兵惟期用之



得當於事有益朕日望各路將軍迅奏膚功並無岐視將軍等亦當深體朕意不可稍分畛域

上又諭軍機大臣曰阿桂奏雜谷地方毗連丹孛總兵五福在彼駐扎已諭該頭人等以五鎮如有派調土兵之處即可聽其調撥所見亦是土司等果屬恭順派令攻奪碉卡自皆聽從出力但既係官派即不便不兼派內地兵丁未免又分兵勢因思番性貪得而勇於私關若餌以攻而有利當無不踴躍爭先將軍

等可妥協籌辦

同日阿桂明亮奏言臣等接奉

廷寄

指示烏鎗打仗之理實為至精至當查賊番所設碉卡多在峯巒之上故碉外溝濠之底比官兵攀越之路尚高且將剝出之土堆積如牆其上挖有鎗眼賊番不必露出頭面已可擊打又且一線細路陡峭險仄僅能魚貫而登其四面可上並可順溝兩

頭轟擊者百不一遇所以此地用兵之難實不能以言語形容至於露出頭面之賊已每次皆有殲戮茲蒙

皇上訓示臣等審察地勢指示官兵遵辦奏入報

聞

同日豐昇額舒常奏言臣豐昇額查看達爾圖一帶路逕積雪全消若分隊進攻使賊番接應不服必有一處得手遂於十六日夜分派官兵令巴三

泰等進攻達爾圖第四五碉卡官達色等攻第二  
三碉卡富爾賽等進攻頭敵大碉臣豐昇額等各  
帶兵接應十七日子刻官達色等所攻第二三碉  
卡已將兩座木柵攻開並將柵內賊番全數殲戮  
其頭敵大碉一路官兵一齊攻上亦將護碉卡之  
外欄砍斷約有四百賊忽從碉後分為四股突  
出希圖抄斷臣等督令各隊官兵首尾迎擊戮賊  
四五十名受傷逃竄者無數至臣舒常於十五日

接准豐昇額密札約於是日同時進攻牽綴賊勢  
臣即派一隊官兵由正路壓下南北兩隊潛伏菁  
林子刻前進賊番狡猾總不敢出碉抗拒臣令南  
北兩隊突出齊至碉邊賊番情急露身堵禦當被  
官兵擊斃數人奏入報

聞

丁酉溫福海蘭察奏言臣等察看昔嶺高峯賊衆  
巢穴橫牆雖將大礮摧損大半而周圍溝內隱藏

之賊必須造至高礮臺往下攻打方可痛殲數日  
連雨未晴臣等乘此砍伐長大木料察看附近賊  
溝之旁得一土阜一面打仗一面造臺約有四五  
丈之高雖比賊峯稍低而攻打已覺得力再達扎  
克角對面高處賊番木柵雖可由兩邊密林內進  
攻但究須下崖向上攻打臣等派副都統阿爾素  
納等亦照昔嶺之法於土阜之上起造至高礮臺  
賊衆望見情形窘迫日間仍舊隱藏不敢出戰而

每逢早晚雨露卽有賊數百人捨命來擾皆被我兵衝殺或死或傷旋行敗遁奏入

上嘉之

同日溫福奏言五月十八日守卡遊擊王滇將從金川脫出之小金川番人阿忠榮綑二名押送至營臣當加詳訊據該番等供稱阿忠係色納木雅寨人榮綑係扎布寨人去年土司差往金川令從喀爾薩爾繞過衮布里脫出現在昔嶺有頭人把

守并噶拉依勒烏圍兩處喇嘛共一千多人幫同  
打仗又有許多喇嘛在噶拉依寺裏每日念經呪  
詛官兵臣查該番雖稱各有妻子在本寨居住但  
久留賊境未便據行遣回現在令其留營派人管  
束一面確查該番等兩寨情形另行酌辦奏入

上諭軍機大臣曰溫福等趕築砲臺俯擊碉根及溝中  
之賊籌辦甚是阿桂豐昇額兩處量其地勢有可倣  
此辦理者亦當依法為之又據奏脫出小金川番人



阿忠等供稱賊酋令喇嘛每日念經呪詛官兵此所謂邪不勝正惟當各持定見不以么膺外道為意其術自無所施官兵等若已聞之將軍等當以此明白切示若無所聞嗣後遇有此等供詞但密存之勿令營中傳說致惑衆聽

上諭內閣曰武爾泰著補授副護軍叅領所遺委署護軍叅領員缺著社洪阿補授社洪阿所遺烏鎗護軍校員缺著前鋒藍翎長噶里補授

同日劉秉恬奏言臣前因功噶爾拉地方險要是以奏請將黔兵調赴功噶爾拉以資攻取茲副將軍阿桂既經奏明現覓間路進攻急需兵力飛行檄調前來臣查當噶爾拉一路覓間進兵既有可乘之機即有難緩之勢惟兵力合之則強分之則弱此項黔兵祇可統歸一路似未便再行分撥至將軍溫福一路所佔地勢廣濶亦有急需兵力之勢查貴州巡撫圖思德前次接奉

諭旨業已預備三千除已調二千外尚餘一千可否一併調取以資進攻奏入

上諭軍機大臣曰劉秉恬奏溫福一路所佔地勢廣濶亦有急需兵力之勢請將黔省預備兵一千名一併調取所奏甚是已飛諭圖思德令將此項官兵迅飭起程馳赴軍營聽用矣軍營消息賊番每易探知今聞我軍需銀兩續撥寬餘各路官兵源源繼進更足令逆酋喪膽番衆離心但古人用兵大率號稱十萬

以張軍聲如添調一千不妨號作五千將軍等當善  
為籌計行之

同日

上諭內閣曰前因牛天昇陞任提督所遺川北鎮總兵  
員缺傳諭溫福等在軍營內揀選出力副將一員奏  
補今據奏列查有貴州定廣協副將成德屢著勞績  
請陞補四川北鎮總兵所遺副將員缺查有貴州  
丹江營叅將握星泰奮勉出力請陞補副將其叅將

員缺又查有建武營遊擊沈寬熟悉番情亦能奮勇  
且係遇缺即補之員應請即行補用等語均照所請  
補授以示鼓勵該部知道



平定兩金川方畧卷六十一